

## PROMOCIJA DIPLOMANATA I MAGISTARA NAUKA UNIVERZITETA U TUZLI

GOVOR – Prof. Dr. Enver Halilović, rektor

Cijenjeni i dragi diplomanti i magistranti Univerziteta u Tuzli,  
Porodice, rodbino i prijatelji magistranata i diplomanata,  
Uvažena ministrica, gospođo Hadžić-Suljkić,  
Poštovane dame i gospodo,  
Cijenjeni profesori i studenti,  
Uvaženi gosti,  
Poštovani predstavnici medija

Današnja svečanost dodjele diploma diplomantima i magistrantima Univerziteta u Tuzli je veliki lični, porodični, ali i društveni događaj.

On će ostati svima nama u trajnom sjećanju. Vama, magistrima nauka i diplomantima, jer ste uspješno završili jednu etapu u svom životu i obrazovanju i ulazite u novu, a nama vašim nastavnicima, jer smo ponosni na vas kao naše najbolje i najviše poslovno i profesionalno postignuće.

Ova svečanost je dokaz da zajednički naponi mladih ljudi, ujedinjene snage nas na Univerzitetu, uz adekvatnu podršku okruženja u kome živimo i radimo, donose rezultate kojima se svi možemo ponostiti.

Može li biti više razloga za lični ponos svakog od vas, za naše veće profesionalno zadovoljstvo, od ove manifestacije na kojoj univerzitetske diplome dobija 1387 diplomanata i 115 magistara nauka? Svakako da ne može.

Ponosno i gordo stojimo pred našim i vašim roditeljima, braćom i sestrama, građanima BiH.

Svi smo sretni i zadovoljni da smo ovim povodom sada i ovdje.

Slobodno, moralno, odgovorno i odvažno kažem: ovi ljudi ispred mene su najbolje što imaju njihove porodice i što ima BiH.

Ovo je ne samo naša mladost, već pouzdana i briljantna budućnost.

Ovom manifestacijom danas Univerzitet u Tuzli daje snažan poticaj razvoju i napretku Bosne i Hercegovine, daje joj impozantan broj kvalitetno obrazovanih ljudi iz preko četrdeset oblasti rada.

Univerzitet je bio i ostat će nezamjenjiv generator razvoja privrede, kulture, zdravstva, obrazovanja, umjetnosti i sporta.

On stvara vrijednosti koje se ne mogu mjeriti novcem, obrazuje mlade ljude i generira visokoobrazovne kadrove za budućnost. Oni koji ocjenjuju naš rad i procjenjuju postignute rezultate trebaju biti svjesni ove činjenice.

Univerzitet u Tuzli posvećuje dužnu pažnju, ne samo kvaliteti sticanja znanja i vještina, već i razvoju tolerantne, otvorene, demokratsko-pravne radne i životne sredine, izgradnji „otvorenog društva“.

Ne želimo da naši studenti idu za poslom po svijetu, već da najsofisticiranije poslove rade u Tuzli, Sarajevu, Banjoj Luci, Mostaru.

Danas možemo reći da ulažemo napore da svoj rad prilagodimo standardima Bolonjske politike visokog obrazovanja. Možemo s ponosom naglasiti kako imamo potpisane sporazume o saradnji sa više od predeset univerziteta iz Evrope i svijeta.

Značajan broj naših studenata i nastavnika studira i radi u različitim obrazovnim, naučno-istraživačkim i umjetničkim projektima brojnih prestižnih univerziteta u svijetu. Na taj način brišemo granice u širenju znanja i usvajanju iskustava drugih i primijenjujemo ih u našem radu, širimo kulturu i vrijednosti Bosne širom svijeta. To je proces koji teče, razvija se i kontinuirano nadograđuje.

Univerzitet u Tuzli danas ima preko 17 hiljada studenata na dvanaest fakulteta i Akademiji nauka i umjetnosti.

Pokrenute su procedure za otvaranje novih fakulteta i studijskih odsjeka.

Ove akademske godine intenzivno i predano radimo na pripremi za podnošenje zahtjeva za eksternu evaluaciju. Kao što se studentski rad i znanje provjeravaju na ispitima, tako i univerzitet ima kontrole i provjere kvaliteta svoga rada i usluga. Intenzivno pripremamo nastavne planove i programe za drugi i treći ciklus studija, unapređujemo bibliotečko-informatičku djelatnost, opremamo nastavno-naučni i naučno-istraživački rad na studijskim odsjecima, radimo na obezbjeđenju dodatnog prostora za stalno povećanje broja studenata. Generalno kazano, radimo sve što će doprinijeti unapređenju kvaliteta i dostizanja viših standarda rada.

Nastojimo našim nastavnicima i studentima omogućiti pristup svjetskim bazama podataka znanja i informacija u kojima se nalaze desetine hiljada časopisa i drugih naučnih publikacija, brojna arhivska građa i stručna literatura na više svjetskih jezika.

Naš je cilj da pružimo studentima što kvalitetnije obrazovanje, da naše diplome imaju istu stvarnu vrijednost s onim koje se stiču na zapadno-evropskim univerzitetima, da postane svejedno da li neko studira u Tuzli, Berlinu, Rimu, Bolonji, Beču...

Permanentno unapređujemo kvalitet studiranja, života i rada, ne samo u akademskim već i kulturnim, sportskim i drugim aktivnostima, kako bi se naš Univerzitet uključio u moderne evropske procese i trendove u svakom pogledu, kako bi u svemu postao integralni dio evropskog prostora visokog obrazovanja.

Svjesni smo da sve može biti bolje. Pozivam vas i cijelu javnost da na tome i dalje radimo zajedno..

Univerzitet je naše veliko zajedničko dobro.

Naš univerzitet u proteklih skoro tri i po decenije od osnivanja, ostavio je dubok trag u izgradnji i kreiranju naučne misli i slaganju visokoškolskog mozaika u Bosni i Hercegovini, ali i cijeloj regiji.

Naši nekadašnji studenti, nekadašnji i današnji profesori prenose baklju znanja i mudrosti širom svijeta. Uvjeren sam da ćete i vi nastaviti slijediti i njegovati najljepše tradicije i vrijednosti svog univerziteta u svojim radnim i životnim sredinama, ma gdje da budete živjeli i radili.

Univerzitet zasigurno zaslužuje visoki respekt i zauzima visoku poziciju na ljestvici visokoškolskih ustanova akademske zajednice, ne samo u BiH i široj regiji, već i na kvalitetnom visokoobrazovnom prostoru Evrope.

Obezbijediti svoje mjesto pod suncem nije danas jednostavno. Svijet je jedno malo selo znanja. Prostornih udaljenosti više nema. Svugdje ste na svakom dijelu zemlje za svega nekoliko trenutaka. Niko se više ne mjeri sam sobom, već drugim. Svi moramo shvatiti da nismo ono što mislimo o sebi, već i ono kako nas drugi doživljava i osjeća.

Naš Univerzitet je opredijeljen i posvećen primjeni i prilagođavanju visokim standardima savremenog studiranja i naučnog istraživanja. Ali, ne očekujte odgovore i rješenja na sva pitanja.

Obrazovanje u Bosni i Hercegovini nikada nije imalo adekvatnu podršku, niti u materijalnom, niti u administrativnom smislu. U vremenu sveopše krize globalnih razmjera kakvo je danas, potreban je veliki napor da bi se postigli skromni rezultati.

Različitim povodima vrlo često se izriču neosnovane ocjene kako danas svako studira, kako je nekad univerzitet bio bolji, kako nekad u nečije vrijeme nije svako mogao studirati, kako tada nije bilo ovog ili onog, itd. Ne osvrćite se na te priče.

Takve ocjene nisu tačne. Uglavnom su posljedica žala za svojom mladošću, za nepovratnom prošlošću.

Naravno, nije sve danas bolje nego nekada, ali mnogo toga jeste.

Uprkos svim slabostima i preprekama, Univerzitet u Tuzli je danas evropskiji, bolji, kvalitetniji, liberalniji nego što je bio.

Dragi i poštovani diplomanti i magistri, mi vaši profesori, ponosni smo što vam danas uručujemo diplome koje ste stekli učenjem i požrtvovanošću, ali i našim nesebičnim zalaganjem da vam prenesemo stručno i naučno znanje.

Uzmite od nas ono što je dobro i vrijedno, odbacite i zaboravite ono što cijenite da nije za vašu budućnost.

Na vašem putu do sada bilo je lijepih i teških situacija i trenutaka. Nadam se da je ovih prvih bilo više.

Vi ste svojim učenjem, mladošću, znanjem, sposobnošću, ambicioznošću, pregalaštvom, požrtvovanošću savladali sve što smo postavili pred vama.

Ne uzimajte kao trajno stanje činjenicu da znanje danas, kao ni do sada, nije bilo jedini garant uspjeha, lične, porodične sreće i zadovoljstva.

Budite optimisti, posmatrajte lijepe strane života i svijeta. Nemojte se zadovoljavati s ovim što ste postigli. Hrabrim vas da idete dalje. Na vašem univerzitetu ste uvijek dobro došli kao svojoj dragoj kući.

Na kraju, poštovani diplomanti i magistranti,

Želim vam još jednom čestitati uspješno okončan jedan ciklus obrazovanja.

Pozivam vas na nastavak obrazovanja na vašem univerzitetu.

Želim vam mnogo uspjeha u vašem daljem obrazovanju i profesionalnom usavršavanju, ličnoj i porodičnoj sreći i zadovoljstvu.

Hvala

Tuzla, 11. 12. 2010. godine